

**Tiada keperluan lantik TPM – PM**  
**AstroAwani**  
**09 Mac 2020**  
**Hilmi Malik,**

PUTRAJAYA: Perdana Menteri, Tan Sri Muhyiddin Yassin memaklumkan tiada keperluan buat masa ini untuk melantik Timbalan Perdana Menteri.

Ini disebabkan terdapat beberapa Menteri-Menteri Kanan yang telah dilantik yang akan membantu tugas Perdana Menteri.

"Menteri-Menteri Kanan akan bantu tugas Perdana Menteri termasuk mempengerusikan mesyuarat Kabinet di waktu ketiadaan saya di dalam negara.

"Maka tiada keperluan pada masa ini untuk seorang Timbalan Perdana Menteri dilantik," katanya dalam sidang media pengumuman Jemaah Kabinet pada Isnin di Putrajaya.

Selain itu kerajaan juga akan mewujudkan satu portfolio khas berhubung Hal Ehwal Sabah dan Sarawak dalam usaha untuk menangani isu pembangunan dan kemajuan sosio-ekonomi rakyat dia dua negeri berkenaan.

Dalam pengumuman tersebut, kerajaan juga telah bersetuju untuk melakukan penstrukturan semula melibatkan Kementerian Pendidikan dengan mewujudkan semula Kementerian Pengajian Tinggi bertujuan memperkasakan Kementerian Pendidikan.

"Dengan ini KPT akan fokus kepada sektor pengajian tinggi dan Kementerian Pendidikan akan memberi tumpuan kepada pendidikan pra-sekolah, rendah, dan menengah", katanya lagi.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/tiada-keperluan-lantik-tpm-pm-233025>